

Gobierno a dicidi

LO PAGA BONUS NA EMPLEADONAN DI GOBIERNO

Esnan cu ta gana 2350 Florin y menos lo bin na remarca

ORANJESTAD(AAN) -- Promer Ministro Eman a indica cu Gobierno a dicidi cu

lo paga bonus pero na e grupo cu tin mas necesidad. Gobierno a dicidi cu lo

duna e empleadonan cu ta gana 2350 Florin pa luna of menos pa luna, un bonus di

200 Florin.

Promer Ministro Eman a splica cu Gobierno a dicidi esaki, den e reunion cu Gobierno a tene siman pasa caminda a trata e peticion di parti di e sindicatonan di Gobierno, entre otro Buchi Wever, kendenan a trece argumentonan padilanti pa hustifica un bonus pa e dianan di pascu.

Gobierno tabatin e punto di bista, cu mirando e situacion financiero cu Gobierno ta pasando aden, ta sumamente dificil y a duna un splicacion cu na e momentonan aki esnan di mas entrada lo mester warda un tiki, pa Gobierno por ehecuta su plan social caminda ta concentra ariba esnan cu tin menos entrada.

Promer Ministro Eman a muestra cu Gobierno a cuminsa ehecuta e plan social caminda a kita e medida di e Gobierno anterior esta e 5% ariba derecho di impor-

tacion. Tambe Gobierno AVP/OLA a ehecuta e aumento di pensioen pa nos grandinan. Gobierno a entrega e proyecto di ley na Parlamento pa aumenta e sueldo minimo y Gobierno ta andando pa ehecuta e plan social.

E sindicalista Buchi Wever a expresa cu e ta completamente di acuerdo cu e plan social cu Gobierno AVP/OLA ta ehecutando.

Promer Ministro Eman a gradici Wever pa e manera cu el a atende e reunion cu a duna resultado. Aki a keda demostra cu no ta tur ora sindicato y Gobierno mester ta para contra otro.

Promer Ministro Eman a haci e entrega oficial di e carta den cual Gobierno ta participa su decision pa duna e bonus. Eman a pidi Wever pa participa e decision di Gobierno na tur e empleadonan di Gobierno cu ta cay bao di e areglo aki.

GOBIERNO TA SUPLICA SECTOR PRIVA PA CELEBRA 40 AÑA DI STATUUT NA NIVEL NACIONAL

ORANJESTAD (AAN) -- Manera DIARIO a duna di conoce for di siman cu a pasa, tabata tin hopi expectativa na Aruba, door di trahadornan cu a bin cu e pregunta si Dia 14 di December proximo lo bira oficialmente liber, manera gobierno a priminti y a laga sa publicamente, algun siman pasa.

DIARIO a cumpli cu su trabao di informa cu Dialuna ultimo e decision mester a cay for di Ministeraad, y asina a tuma lugar.

Ta asina aki cu Gobierno a decreta dia aki liber oficialmente pa Sector Publico. Cu otro palabra, tur ambtenaar y schoolnan tin liber, pero te na unda esaki ta permiti. Por ehemplo, instancianan di servicio manera WEB, SETAR, etc., e trahadornan cu tin cu traha warda e dia ey no ta haya liber pero nan dia mester worde paga mescos cu un dia liber, esta 200%. Pa loke toca sector priva, gobierno ta apela na e doñonan di trabao pa coopera contal cu e dia aki worde celebra na nivel nacional.

PAKICO TA IMPORTANTE: Gobierno su filosofia ta pa no mete den

asuntonan di sector priva, pero esaki mes mester dicidi si ta colabora of no.

Ministro Presidente ta haci un apelacion si, pa sector priva pa duna nan hendenan liber pa celebra Dia di 40 aña di Statuut, ya cu ta un biaha so, y e motibo ta cu pa medio di e mesun Statuut aki Aruba a haya e oportunidad di logra su Status Aparte.

Statuut ta manera un entrapaso, aunque 40 aña pasa no tabata e intencion den e statuut pa Aruba separa for

di Antiyas, pero door di dje di un Colonia Aruba a bira un parti igual den reino, y despues di esey Aruba a haya su Status Aparte cu ta pone den otro posicion.

Cuarenta aña pasa Statuut a worde institui, y ta e mesun Statuut a duna Aruba e posibilidad pa haya su autonomia y pesey e fecha ta importante pa celebra na Aruba henter.

Ta asina aki cu no ta trata di un fecha liber tur aña, pero ta pa e aña aki so.

AMOR PA PODER!!!



NO TIN MAS PROBLEMA

Ta bende foyo pa traha ayaca herbie y zeta. Cla pa lora ayaca. Nos ta entrega na bo cas. Tel: 36924

Telefon di
DIARIO
26747